

Član 21.
(Stupanje na snagu)

Ovaj pravilnik stupa na snagu osmog dana od dana objavljivanja u "Službenim novinama Federacije BiH" a objavit će se i u "Službenim novinama Kantona Sarajevo".

Broj 13-01-02-14651/11
21. aprila 2011. godine
Sarajevo

Ministrica
Velida Memić, s. r.

Na osnovu člana 66. Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 33/05) i člana 13. Zakona o profesionalnoj rehabilitaciji, osposobljavanju i zapošljavanju osoba sa invaliditetom ("Službene novine Federacije BiH", broj 9/10) Ministarstvo za rad, socijalnu politiku, raseljena lica i izbjeglice Kantona Sarajevo, donosi

PRAVILNIK

**O BLIŽIM USLOVIMA ZA OSNIVANJE I RAD
USTANOVA ZA PROFESIONALNU REHABILITACIJU**

I - OSNOVNA ODREDBA

Član 1.
(Predmet)

- 1) Ovim pravilnikom bliže se propisiju opšti i posebni uslovi za osnivanje i rad ustanova za profesionalnu rehabilitaciju, prostor, oprema, stručni kadar, način osnivanja ustanova i druga pitanja.
- 2) Ustanova za profesionalnu rehabilitaciju (u daljnjem tekstu: ustanova) je ustanova u kojoj se organizuje i provodi profesionalna rehabilitacija lica sa invaliditetom.

II - OPŠTI USLOVI ZA OSNIVANJE USTANOVA

Član 2.
(Dokumentacija)

Da bi se pristupilo utvrđivanju ispunjavanja uslova za osnivanje ustanove, potrebno je priložiti slijedeću dokumentaciju:

- a) Obrazloženje postojanja trajne potrebe za obavljanje djelatnosti profesionalne rehabilitacije,
- b) Osnivački akt,
- c) Program rada,
- d) Akt o unutrašnjoj organizaciji i sistematizaciji,
- e) Upotrebna dozvola za građevinski objekat vezano za poslovnu djelatnost,
- f) Saglasnost općine za obavljanje djelatnosti,
- g) Pravilnik o protivpožarnoj zaštiti.

Član 3.
(Lokacija)

Lokacija građevinskog objekta ustanove mora biti takva da omogućava priključak na električnu i telefonsku mrežu, vodovod i kanalizaciju, da ima saobraćajne veze sa naseljem, te da joj se može obezbijediti pristup prevoznim sredstvima.

III - POSEBNI USLOVI ZA OSNIVANJE USTANOVA

Član 4.
(Objekat)

- 1) Građevinski objekti ustanove koji u okviru svoje djelatnosti pružaju usluge smještaja, u pravilu treba da su odvojeni od drugih objekata, a oko njega treba obezbijediti dovoljnu površinu slobodnog zemljišta za prilaz objektu.
- 2) Građevinski objekat i oprema ustanove moraju biti prilagođeni licima sa invaliditetom.
- 3) U građevinskom objektu moraju postojati klozeti odvojeni za ženske i muške korisnike.

- 4) Građevinski objekat ustanove mora imati funkcionalno rasporedene prostorije za obavljanje djelatnosti organizovanja i izvođenja profesionalne rehabilitacije.

Član 5.
(Prostorije)

Prostorije iz prethodnog člana moraju ispunjavati slijedeće uslove i to da su:

- a) svijetle i suhe,
- b) klimatizirane,
- c) vrata u prostorijama u pravilu, bez pragova, veličine propisane prema namjeni prostora, a zastakljena vrata da imaju zaštitu,
- d) podovi izrađeni od materijala koji nisu klizavi i upijajući i od materijala koji se lako održava,
- e) prostorije gdje borave korisnici direktno prirodno osvijetljene i da imaju prirodno provjetranje, a pomoćne prostorije mogu imati vještačko osvijetljenje i provjetranje.

Član 6.
(Zagrijavanje)

Za zagrijavanje prostorija u ustanovi mogu se koristiti svi postojeći oblici zagrijavanja, ali se mora voditi računa da sistem zagrijavanja bude tako postavljen i obezbijeden da se do maksimuma postigne sigurnost korisnika.

Član 7.
(Oprema)

- 1) Oprema ustanove mora biti takve izrade da odgovara namjeni pojedine prostorije i kategoriji korisnika, te tehničkim, higijenskim i estetskim zahtjevima i da se može lako održavati ispravnom i urednom.
- 2) U prostorijama za radne i terapijske aktivnosti, obrazovne i vaspitne aktivnosti, te aktivnosti slobodnog vremena mora biti oprema koja odgovara ciljevima i zahtjevima radno-terapijskog i vaspitno-obrazovnog procesa izvođenja i organizovanja profesionalne rehabilitacije osoba sa invaliditetom.
- 3) Oprema u prostorijama za aktivnosti slobodnog vremena mora biti prilagođena broju, potrebama i mogućnostima korisnika.

Član 8.
(Stručni kadar)

Broj, stručnu spremu i kvalifikacije stručnih radnika potrebnih za obavljanje djelatnosti izvođenja i organizovanja profesionalne rehabilitacije osoba sa invaliditetom, ustanova utvrđuje svojim aktima, imajući u vidu broj i kategoriju korisnika, te standarde i normative iz oblasti obrazovanja i vaspitanja.

IV - NAČIN OSNIVANJA

Član 9.
(Zahtjev)

- 1) Zahtjev za osnivanje ustanove podnosi se Ministarstvu za rad, socijalnu politiku, raseljena lica i izbjeglice Kantona Sarajevo (u daljnjem tekstu: Ministarstvo) koje utvrđuje da li su ispunjeni svi uslovi za osnivanje ustanove propisani ovim pravilnikom.
- 2) Uz zahtjev se prilaže dokumentacija iz člana 2. ovog pravilnika.

Član 10.
(Komisija)

- 1) Za rješavanje po zahtjevima iz člana 9. ovog pravilnika ministrica za rad, socijalnu politiku, raseljena lica i izbjeglice Kantona Sarajevo (u daljnjem tekstu: ministrica) rješenjem imenuje Komisiju za odlučivanje o ispunjavanju uslova za osnivanje ustanova (u daljnjem tekstu: Komisija).

